

SPR Tidak Jadikan Faktor Kesihatan Syarat Calon Untuk Bertanding
Bernama
10 Januari , 2012

JOHOR BAHRU, 10 Jan (Bernama) -- Suruhanjaya Pilihan Raya (SPR) tidak akan menjadikan faktor kesihatan sebagai syarat bagi seseorang calon untuk bertanding pada Pilihan Raya Umum (PRU) ke-13 akan datang.

Timbalan Pengerusi SPR Datuk Wan Ahmad Wan Omar berkata faktor kesihatan calon terpulang kepada parti politik untuk dijadikan pertimbangan dan ia bukan menjadi urusan SPR bagi menghalang seseorang daripada bertanding.

"Masalah kesihatan boleh terjadi kepada sesiapa. Jadi, SPR tidak boleh letak faktor kesihatan untuk menghalang orang daripada bertanding. Kita tidak boleh hendak letak syarat baru kerana orang yang sihat pun boleh jatuh sakit secara tiba-tiba," katanya kepada pemberita selepas taklimat persediaan menghadapi PRU ke-13 kepada pegawai pengurus dan penolong pegawai pengurus pilihan raya Johor, di sini, Selasa.

Wan Ahmad berkata demikian ketika diminta mengulas sama ada SPR akan menasihatkan parti supaya meletakkan calon yang sihat untuk bertanding pada pilihan raya umum akan datang.

Dalam tempoh empat tahun, beliau berkata 16 pilihan raya kecil telah diadakan di negara ini di mana sebahagian besar daripadanya adalah disebabkan kematian wakil rakyat atas faktor kesihatan.

Dalam pada itu, Wan Ahmad berkata seramai 3.6 juta rakyat negara ini yang layak mengundi direkodkan masih belum berdaftar dengan SPR yang sekaligus dilihat merugikan negara.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=638999>